

曾文正公奏稿

曾文正公奏稿

卷之二十二目錄

蕪湖金柱關水陸防軍屢勝摺

同治二年三月二十七日

近日軍情片

石澗埠六安州廬江等處戰守情形摺

四月十二日

覆陳淮鹽暫難改辦官運摺

全日

近日軍情片

克復東關銅城關兩隘摺

四月二十七日

近日軍情並陳餉絀情形片

金陵軍攻克石城石壘摺

五月十一日

水陸會克巢含和三城摺

全日

近日軍情片

攻克江浦浦口九洑洲江面一律肅清摺

五月二十七日

近日軍情片

覆陳金陵壽州軍情摺

六月十二日

覆陳南洋通商大臣無庸改設摺

全日

彙報各路軍情摺

六月二十七日

彙報近日各路軍情摺

七月十二日

蕪湖金柱關水陸防軍屢勝摺

同治二年三月二十七日

奏爲水陸各軍在蕪湖金柱關一帶累月苦戰獲勝續報詳細情形仰祈

聖鑒事竊蕪湖金柱關水陸各營自去秋以來戰爭不休金陵解圍以前業經縷晰具奏十一月以後節次戰勝並奪回灣汊一隘臣國藩已將大概軍情先後具奏並聲明續行詳奏在案上年十一月間僞侍王李世賢自金陵敗遁後糾悍賊數萬人礮船槍划數百號突出東壩將犯金柱關分竄蕪湖曾國荃以該兩隘水涸兵單恐爲賊乘派武明良一營馳紮東梁山朱洪章兩營馳紮龍山橋以爲聲援初八日金柱關守將羅逢元朱

南桂截賊於花津十三十五等曰復敗賊於上駟渡萬頃湖及
梅塘鵞之西岸疊有斬擒十七曰朱南桂與臣岳斌商制敵之
策俄報賊之由陸路來者右至魚壩左至太平府由水路來者
已至三汊河環偪我營是曰南風大作水師不能助戰朱南桂
羅逢元憑營燃礮一發而殪數酋賊爲少卻我軍出濠縱擊復
以火箭焚賊四船賊始紛紛奔北十九夜羅進賢李助發率水
師潛往襲之奪獲二十餘船擒僞清天安陳緒賓而還二十二
日賊由窩頭率黨護舟復犯三汊河營寨勢更洶湧並有用飛
划登岸者朱南桂羅逢元引軍齊出朱洪章武明良亦率隊來
助併力搏戰追及河干萬化林唐學發等水營乘勢奪船數十

號賊之墮水而斃者以千計二十六日水陸各營會議賊屢來
西岸攻我未得一逞不若我軍東渡擊之是夜五更朱南桂朱
洪章羅逢元整旅渡河分道疾進朱南桂令謝大洲率哨勇先
赴上駟渡以截青山後路而自領所部進次卿家橋有一城卡
梗道矢石如雨並有礮划密布橋下我軍猝不得前忽聞水際
礮聲自遠而近萬化林彭楚漢羅進賢等已拆賊浮橋自下游
飛槳而來衝開賊划面面環擊一時蓬飛檣折尸塞河流朱南
桂見水路得手知卡賊亦將奪氣卽飭潘泗知宋楚懷等躍入
卡內縱橫擊刺駢戮無遺羅逢元一枝沿河勦殺正攻涂家渡
二堅壘未下適朱洪章從青山鈔來哨弁嚴洪賓等鼓勇先登

立破二壘武明良亦帶隊趕至環壘奮擊壘中之賊無一得脫其西岸一卡一壘亦經水軍登陸攻破是日斃賊最多奪獲戰船一百一十號洋礮二百餘尊此十一月初八至二十七等日金柱關水陸壘獲勝仗之情形也自有此捷賊之踞伏不出者幾兩月意謂金柱關防務可以少休不料賊之窺伺愈深蓄計愈狡金柱關之上十里爲三汊河又上十里爲龍山橋又上爲梅塘觜又上爲查家灣新圩角又上爲三里埂清水河則蕪湖水師分防之汛地也賊不得志於下游乃繞竄梅塘觜以上本年正月二十四日在新圩角掠船搶渡朱洪章輕騎馳往誘賊深入一擊敗之朱南桂等謀之水營謂賊方在上游西竄我宜

從下游東渡薛鎮老巢可以襲而取也二十七日羅逢元派兵
伏於花津之下而自從中路進朱寬義從右路進朱南桂從左
路進軍次薛鎮賊錯愕無備閉壘死守堅不出戰各哨隊繞壘
而攻水師以巨礮傍堤轟擊賊棄壘爭竄竄至花津者半爲伏
軍所殺我軍力薄不能分防河東老營仍紮於三汊河龍山橋
而分兵戍守查家灣新圩角以上更番換防二月初一日賊由
新圩角悉眾來撲朱洪章整軍以出搏鬪方酣不知另股由萬
頃湖渡過鈔我卡後朱洪章撤隊急退賊已層層包裹我軍敗
挫朱南桂帶隊馳援朱洪章亦奮力衝出重圍始解而弁勇已
多損折賊猶疾如風雨猛撲不休朱南桂派彭維祥向以田堵

河邊一路向世驥劉紹林等堵陶家灣一路仍自帶大旗親兵並振字營兩哨衝入查家橋街中苦戰逾時羅逢元朱寬義分數路截擊斷賊歸路自是轉敗爲勝賊乃奪路竄奔眾軍乘之多有爭渡而溺者次日羅逢元朱南桂密約蕪湖防兵周萬倬吳坤修等水師彭楚漢羅進賢等乘賊屢挫共籌再舉初三日各軍水陸並進行至萬頃湖邊見浮橋一道上下環列賊壘十五座賊卡賊棚延亙十餘里羅逢元朱南桂朱洪章督隊過橋直薄賊壘周萬倬劉祥勝等繼之號鼓雷鳴火器颺發沿河礮船繞擊相持兩時彭楚漢等毀橋登岸縱焚賊棚陸軍爭拔地鍼蟻附而上悉破卡壘誅夷過半遂搜剿至上駟渡以歸十五

日賊以小枝排列梅塘觜查家灣對岸而以大枝由新圩角過河專撲朱洪章營卡時李祥和來自金陵十六日率師助防新圩角甫至該處而長勝營守卡哨勇先經挫退賊如潮湧捲地而來李祥和與吉左振字營各哨悉力堵禦且戰且走退保老營羅逢元朱南桂聞警布置一面飛商彭楚漢等水師來援一面自簡精銳倍道進發羅逢元由陸公壩繞河而上朱南桂朱寬義由霍木山前進行未數里聞水營羅進賢與賊戰於梅塘觜已報捷矣又數里旌旗一色彌望皆賊朱南桂羅逢元等分四路衝入萬刃交下槍子橫飛賊乃大潰我軍直追至新圩角河邊水師彭楚漢等適自梅塘觜追賊而至一鼓蕩洗餘賊盡

溺於河此正月二十四日兩路同捷二月初一初三十五十六等日兩次小挫兩次大勝之情形也先是周萬倬吳坤修兩軍勦賊於南新圩三不管等處進踰四壘斬馘頗眾臣玉麟以該處近逼蕪湖不能專恃陸師乃令任星元左光培等移師船於清水河爲之倚護正月二十三曰賊黨自三里埂循河而下距蕪湖不遠任星元左光培率各船泝流迎擊王三錫登堤督戰中賊槍子洞穿右脅仍復揮兵衝突將賊擊退二月初四曰灣沚踞賊將犯我清水河萬化林會商任星元左光培等乘夜駛船潛往五更卽抵灣沚各船方燃礮轟發適霽營新破西河之賊派舢板從清弋江而下駛合力猛攻更於晨霧中分水勇爲

旱隊在街口積薪焚之賊不及防以爲官軍水陸併至急遽無
措出巢紛竄我軍遂收復灣沚一隘旋值河水漲溢萬化林左
光培任星元等進攻三里埂賊壘日夜不息朱洪章等亦率陸
軍來會賊於三月初十日焚壘宵遁退併黃池萬化林等飛駕
舢板直逼黃池石壘之下該逆自恃岸峻壘堅列礮以待任星
元萬化林二營奮力仰轟左光培帶數哨登岸與水面戰船摩
壘夾擊各賊驚潰我軍立復黃池剗平石壘朱南桂羅逢元等
陸師會約彭楚漢等水營亦於次日盡破伏龍橋護駕墩花津
賊巢擒斬甚夥羣賊遁往金寶圩溧水丹陽一帶此二月初五
日水師攻克灣沚三月初十一等日續克黃池悉收內河要

地之情形也臣等查蕪湖金柱關兩城隘爲江介要衝又爲金陵各營後路上年八九月間賊蹤環伺諸將士五旬苦戰幸獲保全今又屢卻逆氛連克灣沚黃池以通甯國蕪湖之氣實屬始終不懈勞苦功多所有陣亡各員并另開清單請卹在事出力人員可否彙入前次案內容臣等開單奏保以資鼓勵出自聖恩所有金柱關蕪湖水陸防軍屢獲大勝克復灣沚黃池各要隘緣由謹繕摺由驛五百里馳奏伏乞

皇太后

皇上聖鑒訓示謹

奏

近曰軍情片

同治二年三月二十七日

再近曰軍情金陵雨花台一軍撥彭毓橘七營北援無爲州後
兵力稍單守局尙穩金柱關蕪湖甯國等處距賊漸遠防務大
鬆徽州三面皆賊臣僅畱唐義訓一軍防守徽休兩城十分單
薄幸賴左宗棠派劉典王文瑞兩軍沈葆楨派王沐一軍分駐
休甯祁門竭力防剿劉典王沐各營在於長林梅嶺岩寺草市
等處疊次苦戰獲勝王文瑞亦於漁亭七里橋等處屢戰獲勝
十一日大破黃文金股匪於小路口徽休祁門各城或可倖保
然賊思假道徽境內犯江西其謀未嘗一日息也其嶺外石埭
太平等處又有古賴劉藍等股與嶺內黟祁北面之賊粘連一

片縱橫蹂躪

臣

飭朱品隆由青陽進攻石埭冀掣動徽賊之後

路三月二十二日大戰獲勝仍以賊多兵寡未敢輕離青陽之本防深入石埭之重地鮑超渡江北援之師三月十六日始抵無爲州正欲進剿石澗埠十七日黎明蕭慶衍彭毓楠會合水師由黃雒河進兵並約被圍之毛有銘劉連捷等由內擊出大破賊壘賊卡立解石澗埠之圍鮑超聞重圍已解登舟仍回上游欲再踐赴援江西之約臣聞賊之大股並未退回巢縣悉銳上竄直撲廬江乃飛檄鮑超急登北岸先援廬江忠酋於十九日攻撲廬江縣城守將梁美材吳長慶等登陴堅守伺隙出擊擒斬甚眾賊由界河迤邐而北分竄桐城舒城一帶其由鄂東

竄之捻股在蘄水分爲兩枝一枝回竄黃州一枝下竄皖境十八日攻撲宿松縣十九二十等日越過太湖潛山界上二十二日自青草塢突撲桐城守桐城者爲湖南提督周寬世開城迎擊擒斬頗多賊遂入孔城鎮與廬江之大股髮逆聯成一片矣據搜獲忠酋僞文將由舒城六安而上英霍麻城宋埠一出黃州一出漢口擾犯湖北意欲掣我南岸之兵以援北掣我下游之兵以援上無非圖解金陵之圍臣以該逆規畫甚大蓄謀甚狡湖北爲數省樞紐不可稍有疏失飛咨官文嚴樹森調成大吉回駐灊口撥水師速赴武漢聞李續宜於初十日自湘啟行擬俟其道出鄂疆商請暫駐黃州會籌鄂皖大局當此南岸喫

緊之際臣方恨無力援徽援江乃北岸事變疊生下則江浦浦口和含巢縣一片逆氛上則髮捻巨股疊撲各城兼圖鄂境而苗練復於十八日圍攻壽州並在正陽關毀關擄船叛迹大露微臣調度乖方艱危百出憂憤何極所幸浙滬兩軍捷書頻至浙軍若克富陽一城杭州卽有可圖滬軍若克崑山一城蘇州卽有可圖仰託

聖主威福但求皖鄂江西不大決裂與各悍賊相持數月俾蘇浙果收成效或者大波特起旋慶安瀾焦灼無地之時輒不勝禱祀微倖之想除各路戰狀分案詳奏外合先附陳大概伏乞皇太后

皇上聖鑒謹

奏

石澗埠六安州廬江等處戰守情形摺

同治二年四月十日

奏爲忠逆大股疊撲城營官軍苦守力戰石澗埠廬江桐城舒城六安州先後解圍恭摺馳陳仰祈

聖鑒事竊自石澗埠圍營之賊經水陸各軍合力勦退後進撲廬江分竄桐城舒城與由鄂東下之捻股聯爲一片臣於三月初二日附陳大概在案僞忠王李秀成以三月初二日犯石澗埠揚隊焚屋近逼我營該處將領毛有銘劉連捷等密飭士卒穩守營寨以觀其變初三初四等日賊眾數萬圍攻南後營及瑞左溥左溥右元中信中等營東草如山呼聲動地各員片板撲近溥右營濠邊毛有銘以中右營兩後哨前往助守排礮

環擊殪其前鋒賊猶晝夜猛攻相持不下如是者數日初七日
毛有銘挑銳卒潛出濠外突焚積草劉連捷復於初九日派隊
奮擊悉毀攻具賊爲少卻仍於營前營後增壘盈百層層合圍
營中文報不通糧運汲道一時俱絕如是者又數日曾國荃在
金陵聞警卽派彭毓橘率馬步八營倍道而至彭玉麟亦調周
萬倬劉祥勝等渡江來援遂與蕭慶衍會軍於黃維河十六日
彭玉麟親督水師進次海子口牽制東關一路遣死士溷入石
澗埠營中密約詰朝會戰是夜四更彭毓橘率師進攻釘子壩
皇圖寺各賊壘蕭慶衍周萬倬率各師進攻黃龍岡迎珠塔各
賊壘號礮齊發毛有銘卽於重圍中衝出攻草鞋嶺之壘劉連

捷出攻石澗埠之卡王載駟等亦馳出戰賊於羊虎山瞥見黃龍岡迎珠塔火光突起知黃雒河援軍先已得手遂乘勢猛進併力夾擊俘斬無算彭毓橘亦自皇圖寺來會縱橫盪洗羣壘悉平而東關賊援亦爲水師堵退忠酋各黨乃分向小嶺開成橋而遁此三月十七日力解石澗埠重圍之情形也臣所調鮑超北渡之師十六日抵無爲州未及移營進剿聞賊已解圍以去擬回軍以踐上援江西之約甫及登舟猶未行也賊之另股竄盛家橋者先於十二十三等日逼犯廬江該城守將有吳長慶等三營又截畱梁美材等三營分段繕守乘賊喘息未定一擊卻之十五日王占魁出城雕剿又捷於羅家埠至十九日忠

酋大股白石澗埠而來悉萃廬江圍撲城池臣飛檄鮑超舍舟登陸轉援廬江而廬江之賊已於十九二十等日經吳長慶梁美材等堅守得完伺懈出擊賊遂解圍西竄梅心驛二十一日突攻舒城之西南兩門守舒城者爲安肅道蔣凝學分軍迎剿賊退七里河是夜設伏誘賊大挫兇鋒執僞天將羽天福於陣維時捻逆張宗雨髮逆馬融和等由豫而鄂而皖間道疾馳足無停趾瞬息而至桐城守桐城者爲湖南提督周寬世出戰於三里街淩厲無前賊大怖將謀宵遁我軍聯騎追剿該逆遂往孔城鎮與忠酋合而爲一矣二十三日忠酋前隊衝至六安州之十里埠該州城大而圯畱守者僅有蔣凝學部下王臨祥袁

秀林兩營及糧白道員曾廣翼知州何家驄而已四人者力籌
守禦二十四日賊以大股繼至自東南迤北而西植旗若林面
面結壘軍士守定垛口各以巨礮環轟曾不少卻二十五日賊
分三路來攻將抵城根東門城垣久爲風雨所損猝傾六七丈
一時塵土蔽空羣賊大呼擁入王臨祥麾兵齊上抽刃攢刺擲
尸城下曾廣翼袁秀林飛騎繼至悉戮進口之賊搶築木城二
道二十六日賊攻小北門旋即擊退二十七日賊眾傾巢而出
自北城以至西城幾無寸隙憚我城上礮火猛烈欲前目卻其
尤悍者挽盾直前誓以死搏我軍屹立不動俟其躍過城濠火
球擲下焚賊無數始各裹尸而退二十八日曾廣翼王臨祥見

城南一二里外掩映賊旗徘徊不進乃令勇士縋城馳擊斃賊
六人三十日又縋死士出襲鮑家圩擄糧之賊斬僞富天豫張
承得擒僞左監議劉朝柱臣以六安州係淮南樞紐恐忠酋與
苗捻勾合愈不可制檄鮑超由廬江往援檄劉連捷彭毓橘毛
有銘由無爲州往援鮑超將至舒城賊遂於四月初二日解圍
遁往廬州一路此廬江桐城舒城防守得完及六安州解圍之
情形也臣查無爲州爲江北之膏腴六安州爲皖鄂之要衝忠
酋以全力圍撲石澗埠冀破無爲旋由廬江舒桐糾結捻股圖
爭六安一城其行蹤爲至疾其蓄謀爲至狡諸將士苦籌戰守
城營均獲保全使賊不敢橫竄鄂疆均屬著有微勞所有固守

右潤埠六安州尤爲出力之布政使銜記名按察使劉連捷請
交部從優議敘記名道毛有銘請

賞加按察使銜並

賞給勇號藍翎江西候補道曾廣翼請

賞加鹽運使銜並

賞換花翎候補副將王臨祥袁秀林均請

交軍機處記名遇有總兵缺出請

旨簡放署安徽六安州事補用同知直隸州何家驄請以知府
補用先換頂帶其餘出力員弁可否容臣查明酌請獎敘之處

出自

聖恩花翎參將黃仁親藍翎都司趙人和藍翎守備蕭淇松守
備劉紹志藍翎千總吳秀高藍翎把總李大材毛昌五謝仁週
藍翎外委李升山沈謙德向愼光外委童景星均在石澗埠接
戰陣亡應請

勅部各照本職從優議卹所有皖北各城營防守解圍緣由謹
繕摺由驛五百里馳奏伏乞

皇太后

皇上聖鑒訓示謹

奏

覆陳淮鹽暫難改辦官運摺

同治二年四月十二日

奏爲淮南引鹽察酌現在情形暫難改辦官運恭摺覆陳仰祈
聖鑒事竊臣承准議政王軍機大臣字寄同治元年十二月初
十日奉

上諭本日據中允錢寶廉片奏請官運淮鹽以裕軍餉等語淮
南鹺務廢弛已久現在運販楚北者劣員奸商居多曾國藩雖
設卡抽釐而所得未多前據戶部奏請飭該大臣酌提成本由
官督運則利權操之自上而於皖浙軍餉必能稍資接濟茲據
該中允所奏與戶部前奏是否可行著曾國藩一併悉心議奏
等因欽此旋於本年正月二十八日接准戶部來咨淮南鹽務

應先試辦官運一案經該部詳晰具奏請

飭臣遴選公正大員實心經理奉

旨依議欽此並鈔錄原奏咨照到臣當卽轉行兩淮運使喬松年議覆去後茲據該運使詳稱竊繹戶部之意係欲加徵課銀收回引地以冀漸復舊規又恐商販不前改由官運洵是籌辦南鹽至要之策無如引地爲鄰鹽侵占日久籌銷極難正課因釐捐抽納過多加增非易上年江路漸通楚西兩岸亦嘗招商試辦乃以淮鹽久不到岸所銷盡是川鹽粵鹽蓋川粵之成本較輕賣價可減淮鹽之成本最重賣價獨昂故淮鹽之疲滯斷不敵川粵各鹽之旺銷則商旣不前卽官運亦恐無起色至部

文所稱仍以四百斤爲一引令繳正課每引三兩七分三釐零
係照承平時科則而言現在除完課外運司衙門所收釐金及
沿江各釐每鹽一票約共完銀十五兩以上釐捐如是之重是
以試運楚西之鹽止能照稅鹽章程完納稅鹽每票九百斤僅
完課銀一兩八分尙且無利可圖今欲以四百斤鹽完三兩有
零之課其勢更有難行若議減釐增課則各路軍餉處處皆待
釐金接濟豈能遽爲裁減部文又稱令運使嚴禁奸商私行興
販以疏官鹽銷路查私鹽自應嚴緝究辦若因官運而概禁商
人運鹽則恐官運猶未辦成而商販轉先裹足況南鹽運本極
大籌辦官運縱有十萬兩之本尙未足以資周轉亦不能不藉

羣商之力廣爲興販開拓銷路部文又稱勸諭商民捐輸運本雖准按照籌餉例減成給獎而江北捐款林立減折上捐所在多有斷難期其踴躍部文又稱聞內地現已購備輪船七隻於此項船內撥出數隻拖帶鹽船查前購輪船尙未入江且爲水師打仗而設斷難撥爲拖帶鹽船之用至商販公雇輪船報明在案者現有四隻若歸官運卽此雇船之費已不易籌蓋淮南目下情形不患無商之可招而患無利之可獲惟有將楚西兩岸銷路大加整頓仍由運司衙門招來新舊各商運赴楚西銷售以期淮鹽逐漸進步爲得寸得尺之計前經都統富明阿奏請招商旋派知府杜文瀾前往楚北試辦如果辦有成效再當

另議章程詳辦等情具詳請奏前來伏查各軍餉絀是臣之隱憂兩淮鹽務是臣之專政假使官運淮鹽果有大利可圖臣豈不思竭力籌辦謀本分自然之利濟本營非常之貧無如楚西兩岸被粵私川私侵佔太久斷非一蹴所能挽回此時必欲爭回引地非大減賣價則不能敵鄰私非先輕成本則不能跌賣價據現行事例九百斤一引者並鹽本稅課釐金運腳拖費計算幾及四十兩成本已屬極重若如部議減爲四百斤之引加爲三兩有零之課又以重價購買之輪船拖帶試行之官鹽則成本更重安能敵鄰私而暢銷路若將各處釐金概議裁減則下而鎮揚滁州之軍餉上而九江湖北之關釐皆將向臣處索

奏稿卷二十二
取而臣軍除沿江鹽釐外亦別無可籌之餉實有不能終日之
勢臣悉心酌核官運雖屬良法目前尙多窒礙應暫照該運使
所議俟富明阿派辦之官鹽試行有效再行另擬章程奏明辦
理所有淮鹽現難改辦官運遵
旨議覆緣由謹繕摺具奏伏乞

皇太后

皇上聖鑒訓示謹

奏

近日軍情片

同治二年四月十二日

再近日軍情雨花台金柱關蕪湖東西梁山各營水陸穩固均無戰事甯國附近如南湖新河莊等處涇縣附近如茂林章家渡等處均有賊蹤游弋防務尙難鬆勁然甯郡及涇縣南陵青陽各城灣沚及西河清弋江各隘水陸防守綦布星羅朱品隆在青陽亦於春末夏初疊獲勝仗保甯國之後路足以仰慰宸廑徽郡防兵單薄是臣布置最疏之處去冬甯國之賊今春浙東之賊現在麇集於石埭太平及徽祁饒景一帶實屬防不勝防剿不勝剿幸左宗棠派劉典一軍沈葆楨派王沐一軍先後援徽三月十七日會克黟縣十九至二十五等日搜剿近城

之賊大破廬村黃村之賊王文瑞亦將柏溪金字牌零股一律
擊退黟祁境內甫靖羣氛而賊之竄往鄱陽者已由規田街進
逼浮梁王沐將回駐景德鎮劉興亦將馳援饒景江西之門戶
可虞而徽州之空虛尤可慮矣現調李榕一軍由北岸馳赴建
德進援祁門調席寶田一軍由湖南馳赴撫州進援徽境不知
能迅速趕到併力驅除否僞忠王自六安州解圍下竄或稱其
回救蘇州或稱其圖犯揚州裹下河或稱其糾合苗黨竄擾濱
淮各屬其確耗尙不得知然悉數東趨并未西犯鄂疆卽屬大
局之幸臣現檄鮑超由廬州追擊忠酋卽從柘皋進兵以攻巢
縣之北檄劉連捷彭毓橘蕭慶衍從迎珠塔進兵以攻巢縣之

東檄蔣凝學毛有銘由六安進援壽州並調成大吉由鄂回皖
會師壽州共討苗黨該州糧缺兵單倘能嬰城固守再過半月
各軍次第趕到合力痛剿而僧格林沁李續宜遵
旨偕來誅屢叛之逆豎保長淮之重險庶足以彰天討而定人
心除各路戰狀分案續奏外合先附陳大概伏乞

聖鑒謹

奏

克復東關銅城閘兩隘摺

同治二年四月二十七日

奏爲水陸各軍會克東關銅城閘兩隘恭摺馳陳仰祈

聖鑒事竊自僞忠王李秀成在六安州解圍下竄鮑超跟蹤追擊卽從柘皋進兵以攻巢縣之北劉連捷彭毓橘蕭慶衍等從迎珠塔進兵以攻巢縣之東臣國藩於四月十二日附陳大概在案惟是欲圖巢縣必先力取東關銅城閘以毀其門戶初五日臣玉麟商令蕭慶衍彭毓橘等專攻銅城閘派水師曾泗美會合劉連捷毛有銘專攻東關踞東關者爲僞閏天安蕭逆高壘深溝擁眾堅守劉連捷知該隘之未可力爭也乃於初六日夜令師船由蠓子口潛渡陸軍緣堤埂而進伏於九峯山下另

派譚國泰帶勇士數十人從東關近處以木盆偷渡毀柵越濠突逼壘下肉薄而登賊以礮石外擊密若飛蝗胡德雲石太和從煙燄中駕梯直上中礮死之劉連捷遂督副後南後兩營奮力繼進曾泗美從水路列礮環轟聲徹霄半壘賊惶遽欲遁九峯山下伏兵齊出合軍衝殺立破石壘遂於五更克復東關黎明七陳村打鼓山南水坳之賊一齊來援劉連捷令譚國泰守定石壘親率副後等營迎敵毛有銘率湘右等營由九峯山斜刺而入賊乃卻走我軍以賊未受創必將復至遂於石壘之旁增修一壘以爲犄角嚴陣以待之俄報賊又從林頭鎮吳家村揚隊而來毛有銘隨令葛清泰向南水坳進自率湘右營繼之

劉連捷令李瑞二向打鼓山進自率副後營繼之王載駟向九
峯山進劉秉珩向七陳村進分道並進搏鬪移時王載駟等聞
南水坳打鼓山之兵已將得手卽帶部卒搶上九峯山曾泗美
率舢板從河曲中出斷賊歸路擒斬甚眾盡焚各賊卡賊館而
還此四月初七日攻克東關并擊退援賊之情形也其陸師之
分攻銅城關者蕭慶衍彭毓橘等軍於初六日由黃墩渡河過
八角廟下寨會約喻俊明成發翔張錦芳唐敏義水師四營奮
攻一日夜賊但堅修老巢伏匿不出并於南北兩街各添四壘
爲負嵎死守計時值河水泛溢圩田皆成巨浸臣玉麟於初七
日令喻俊明成發翔等鑿開土埂師船從決口駛入南北兩圩

直薄賊巢之下更番擊之初九日各軍會商畱彭毓橘所部扼守八角廟分蕭慶衍所部移剿百旺市五顯集一帶先清銅城閘之後路分軍爲三百旺市接戰正酣三汊河雍家鎮兩支亦至遂將兩處卡壘一律平毀振旅而旋水師之人南北圩者乘勢猛攻環賊壘之三面皆有舢板小划拋擲火毬陸軍亦萬槍齊放五更時踰毀南街土壘遂攻破銅城閘一隘駢尸塞道幾無脫者而林頭鎮另股亦旋爲水師擊走此四月初十日續克銅城閘之情形也臣等查賊踞北岸以巢縣爲根本以東關銅城閘爲屏蔽橫據重險賊計甚堅仰賴

聖主威福將士同心數日而下兩隘從此鮑超攻其北劉連捷

扼其南蕭慶衍彭毓橘圍其東巢縣必有可克之機此次力戰陣亡之藍翎千總彭勝華藍翎把總曾彩雲把總胡德雲石太和等應請

勅部從優議卹以慰忠魂所有水陸會克東關銅城間緣由謹繕摺由驛五百里馳奏伏乞

皇太后

皇上聖鑒訓示謹

奏

近日軍情并陳餉絀情形片

同治二年四月二十七日

再近日軍情大江南岸雨花台各營堅守如常蕪湖甯國南陵
數城金柱關灣沚西河數隘水陸布置防務尙鬆涇縣守將易
開俊於四月十八日在章家渡擊賊大勝朱品隆亦在青陽境
內擊賊屢勝徽州白王沐回駐景德鎮後賊又從太平竄入歙
縣之許村唐義訓督軍擊卻追出簪嶺前調李榕南渡一軍十
九日進攻建德未下二十三日再戰克之臣檄令進攻彭澤鄱
陽會合韓進春席寶田等軍由內打出冀埽上游之羣賊而保
江西之完區大江北岸自忠酋下竄賊勢漸衰我軍攻克東關
銅城閘劉連捷進紮望城岡彭毓橘進紮巢縣東門水陸攻擊

一晝夜遂於二十二夜克復巢城現檄鮑超與蕭慶衍彭毓橘
劉連捷諸軍進取和含二浦直達九洑洲冀驅賊併歸南岸較
易勦辦苗沛霖圍攻壽州已逾一月城中僅有五百人絕糧者
八日署知州毛維翼與民苦守可嘉可憫蔣凝學於十六日自
六安援壽甫抵謝埠又爲羣捻所阻毛有銘自東關援壽以無
餉可領軍行稍滯成大吉自麻城援壽亦以餉缺未能成行今
年兵事之遲鈍半由於餉需之奇絀臣部八萬餘人益以李續
宜部下二萬人欠餉多者十五箇月少亦八九箇月昨鮑超自
樅陽登岸苦無途費其部卒逃散一千餘人毛有銘自東關起
程其部卒逃散數十人并據將倡逃之將弁鄒慶星等稟請參

革臣帶兵九載今年始有餉匱兵逃之事從前徽甯兩防每月額餉二十萬皆由浙江供支臣接辦以來庚辛二年奏撥江西漕折每月五萬至壬戌年奏撥四萬奉

旨允准旋經撫臣沈葆楨奏畱供本省防兵之用戶部議准而臣所統徽甯兩防遂無一毫可恃之餉矣江西通省釐金臣指定河口景鎮等卡協濟左宗棠月約三萬兩指定吳城等卡協濟彭玉麟月約二萬數千又撥給本省水師劉于濤孫昌國兩軍月約二萬數千四處共支去八萬而實解臣台者遂無幾矣湖南東征局釐金今年因米價昂貴畱楚買米而現銀解皖者亦無幾矣廣東釐金奏定專充皖浙軍餉近亦有畱供本省之

議臣力小任重統軍過多每月需額餉五十餘萬而入款不過
十餘萬不敷之數甚鉅且唐訓方近駐臨淮李世忠近駐滁州
索餉之文月凡數至卽赫德所購輪船指曰可到亦必向臣處
索餉昔以數人分辦之軍務今專責於一人昔以各路分籌之
軍餉今併萃於一身夙夜祇懼恐微臣之顛踣立見而大局之
決裂尤可虞也臣在軍多年從不敢輕上請餉之奏蓋不欲以
危詞上煩

聖聽又不欲以苦語渙散軍心茲因有勇丁逃散之案不得不
據實密陳可否籲懇

天恩在於九江洋稅項下每月撥銀二萬兩解皖濟餉出自

鴻施仍懇

勅下廣東督撫將釐金全解皖浙本省不得截留大局幸甚臣
忝任江督已滿三年前二年事機稍順去夏至今變故紛乘幾
蹈大戾目下風波雖定憂悸未忘誠恐積日累年更無成效仰
祈

皇上天恩特派大員來南於

欽差大臣兩江總督二篆之中分綰一篆俾臣責任略輕稍釋

惴慄之懷臣昨專差進京與臣弟國荃并辭浙撫之

命亦因識淺才疏恐妨賢路均祈

俯鑒愚忱次第允准不勝感激悚切之至理合附片密陳伏乞

聖鑒訓示謹
奏

金陵軍攻克石城石壘摺

同治二年五月十二日

奏爲官軍攻破雨花台偽城及聚寶門外諸石壘恭摺馳陳仰祈

聖鑒事竊僞忠王李秀成自六安戰敗率眾東竄紛傳將回救蘇州江蘇撫臣李鴻章函商曾國荃囑其力攻上游以分賊勢無令忠酋得以全力援蘇曾國荃以忠賊回援蘇州固屬可慮卽直犯揚州裏下河尤爲可虞計莫如急爭金陵老巢以攻其所必救使城中之賊不暇遠趨蘇郡而北岸之賊亦不敢專注揚州乃於四月二十七日宣諭各軍多備攻具先登者上賞退後者必誅漏甫一下齊隊出濠六路併進每路以一營爲前鋒

兩營爲策應令李臣典趙三元武交清等專攻雨花台石城趙
清河黃東南攻聚寶門外南卡石壘晏澧週易春光攻西卡石
壘何玉貴張詩曰楊西平攻東卡石壘又令陳澍率李定元朱
文光羅景集等出中路應之蕭孚泗率蕭致祥李泰山胡松江
等出右路應之易良虎禹志漣等出左路應之前鋒各營於三
更時匍伏蛇行偷近石城石壘東草填濠架梯欲上賊遽驚覺
燃礮外擊我勇中礮而踣者五人眾勇辟易李臣典立斬二卒
搯旗直前軍中無敢少後者羣以火箭火毬盤空飛擲悉入石
城天漸嚮明趙三元率中軍親兵從礮台下蟻附而升李臣典
武交清各率部卒從中右兩路內薄齊登維時敵樓火發賊方

爭相奔救不料煙霾中人聲鼎沸亂鋒交下我軍已奪偽城一座該處地高勢險俯瞰東卡西卡南卡九石壘歷歷在目旋見趙清河黃東南晏澧週何玉貴等乘勢猛擊平毀數壘餘卽棄壘竄遁蕭孚泗易良虎陳湜縱軍圍剿將賊追過長干橋蹙偏入水者無數曾國荃以雨花台地段遼闊近接城闌賊必與我爭此要害乃抽四營駐守石城增修六新壘以接各舊營之氣並調集後路各營以待之未幾城賊出大股潛匿附郭屋舍中以誘敵各軍蓄銳不發俟賊少懈突出奮擊蕭孚泗陳湜易良虎扼其前趙三元趙清河黃東南晏澧週易春光伍維壽等截其後賊不得逞遂繞雨花台乘我新營未定悉銳猛攻抵死不

退李臣典趙三元武交清張詩曰等督隊馳援黃潤昌成東昂等亦引軍來助搏鬪移時賊乃負創入城是役也倅執逾二百名殲戮近六千人奪獲礮械尤多軍士亦小有傷折臣查雨花台及金陵南門外各石壘據險雄峙屏蔽城垣昔年和春張國樑等屢攻未下茲賴

聖主威福諸將同心克此堅壘不特可分蘇揚之賊勢亦於倡勦金陵深有裨益此次首先登壘戰功最著之提督銜記名總兵李臣典請

交軍機處記名遇有提督缺出請

旨簡放記名總兵晏澧週請

簡授總兵寶缺並

賞加提督銜副將趙三元武交清趙清河何玉貴黃東南伍維壽均請

交軍機處記名遇有總兵缺出請

旨簡放其餘出力人員可否附於巢含和案內容臣開單保奏出自

恩施陣亡各員弁查明另案請卹所有官軍攻克雨花台等處石城石壘緣由謹會同大學士湖廣督臣官文江蘇撫臣李鴻章由驛五百里具奏伏乞

皇太后

皇上聖鑒訓示謹

奏

水陸會克巢含和三城摺

同治二年五月十二日

奏爲水陸各營會克巢縣含山和州三城恭摺馳報仰祈

聖鑒事竊自官軍疊克東關銅城閘後遂由望城岡攻復巢縣

臣國藩於四月二十七日附陳大概在案先是銅城閘旣克劉

連捷與蕭慶衍彭毓橘謀欲取巢縣必自進兵望城岡始十六

日劉連捷率所部各營會合彭毓橘陸師成發泅水師分道並

發行不數里訶知箐箕山麓伏有賊股劉連捷恐爲所乘姑駐

軍以觀其變俄而賊已大至一枝由陳村來一枝由斬龍岡來

旌旗迷目布滿原野我軍整隊禦之賊恃眾悍往來猛撲數次

互有損折旋分賊騎掠陣而過劉連捷知有狡謀麾兵稍退賊

已半鈔後路適礮艇連檣駛至彭毓橘亦帶馬步六營從斜徑刺入三路合圍擒斬頗眾劉連捷乘賊戰敗遂於筲箕山搶築營牆彭毓橘驅賊至七八里外仍回駐迎珠塔下十八日蕭慶衍率師來會遂於十九日進次洪家山輕騎至望城岡履勘形勢遙見賊於巢湖口岸跨水爲壘水際密排賊划阻我進兵之路成發翔曾泗美會督澄海清江左右四營決開圩埂灌水入圩更鑿圩內大隄將移舢板以入巢湖賊乃增壘塞隄百計撓我卒不得逞二十日蕭慶衍劉連捷兩軍拔赴望城岡未及下寨賊卽擁眾渡河成發翔俟賊半渡令各水營由決口飛槩進圩由圩達湖鈔過賊後賊方逡巡卻顧我舟師已橫截圩中萬

礮齊轟斷其歸路成發翔曾泗美等又分水勇乘勢登陸四出
痛剿賊酋蕭主將梟悍絕倫左營裨將李宏試縛而斬之羣賊
奪氣不知所爲我軍水陸交攻襲破二卡一壘壘中壘外積尸
若阜罕有脫者此四月十六日大戰箐箕山二十日偪紫望城
岡堵剿獲勝之情形也望城岡旣紫定則巢縣之南賊無竄路
陸師可薄城而營水師亦可繞湖而陣二十一日彭毓橘由迎
珠塔拔隊進紮東門外之密廟地方蕭慶衍撥軍護之次日水
師成發翔唐敏義從南隄入五聯圩轉攻西門張錦芳攻五聯
圩隄上之石卡曾泗美喻俊明同攻東門石壘並約陸師彭毓
橘移逼城根揚隊搦戰賊據城壘矢石交下我軍且卻且前相

持竟曰二更後水師環隄猛擊悉焚湖中賊划毀其浮橋火毯橫擲入壘火箭飛射入城喧聲鼎沸劉連捷亦自河南飛騎馳至共破密廟沿河六石壘壘賊競向東門進城曾泗美喻俊明卽躡蹤從東門而入成發翔等從南門攻入適鮑超亦派數營自廬郡西來遂於二十二夜克復巢縣二十三日鮑超由柘皋營軍出清溪鎮擊賊勝之略地而東是晚蕭慶衍亦截尾賊於林台圩旋合劉連捷彭毓橘等營渡河前進於二十四日與鮑超會師含山而賊已宵遁鮑超蕭慶衍等以賊去未遠星夜往襲和州比入州境天甫曙也但見賊旗靡亂不絕於道而水師成發翔約駐泊鍼魚觜之楊占鼇已駛入和州港內城賊逃遁

不及半聚壘中鮑超肅慶衍與水師環壘急攻賊大怖出壘
降盡釋脅從者而斬其頭目以徇於是各整部伍入城少息所
獲遺穀甚多此二十二日攻克巢縣二十四五等曰連復含山
和州之情形也臣等查賊渡北岸由和州而含山而巢縣力爭
要地堅踞數月意將西竄鄂省北犯淮甸掣動上游之全局冀
解金陵之重圍幸仗

天威大彰捷伐四日之內疊下三城從此進取江浦九洑洲或
可翦其枝葉圖拔金陵此次苦戰數月記名提督江南京口協
副將成發翔功績最偉應如何優加獎勵之處恭候
聖裁按察使銜記名道彭毓楠請

賞給勇號記名提督蕭慶衍請

賞給提督應得封典記名總兵張錦芳副將李宏試均請

賞給勇號副將會泗美請

交軍機處記名遇有總兵缺出請

旨簡放總兵銜副將劉長槐朱吉玉趙太和均請以總兵記名

請

旨簡放并

賞加提督銜副將唐敏義請

賞加總兵銜其餘出力人員容臣等查明擇尤酌保籲懇

恩施以資鼓勵至力戰陣亡之花翎副將銜參將陳邦榮楊繼

隆傳堂春花翎游擊鄭楨祥藍翎游擊劉春福都司丁文彬藍翎守備張彪藍翎外委屈傳芝顏隆許李連勝及因傷身故之花翎副將黃福田花翎游擊潘宏勝二員均請勅部分別從優議卹所有官軍水陸會剿疊復三城緣由謹繕摺由驛五百里具陳伏乞

皇太后

皇上聖鑒訓示謹

奏

近日軍情片

同治二年五月十二日

再近日軍情南岸曾國荃一軍自克雨花白石城及南門外各壘後汛地愈廣防兵愈單抽調金柱關守兵千人移紮金陵又調回彭毓橘一軍回顧老營仍畱劉連捷步隊楊鎮南馬隊隨同鮑超進攻江浦九洑洲等處其蕪湖金柱關甯國灣沚西河東西梁山青陽南陵池州一帶節節布置均尙穩固五月初三日太平石埭之賊分竄茂林涇縣守將易開俊督隊迎勦殲斃盈千徽州自四月肅清後近無戰事其竄江西之黃文金等股在鄱陽浮梁境內屢爲官軍所敗現在斜趨都昌湖口等屬李榕一軍於端午日破賊於彭澤之項家山初七日進援湖口綜

計饒州九江各屬水路有劉于潯孫昌國左光培丁義方等營
陸路有段起李榕席寶田王沐韓進春等營而劉典又自徽州
赴饒聞江忠義亦將自湖南赴潯水陸兵力會萃數萬當可驅
賊出境不使深入腹地矣苗逆攻圍壽州繞城築壘數十座周
以長濠城西濱淮一路環列礮船帆檣如織蔣凝學毛有銘援
壽之師於四月二十七日進紮九里溝二十八日之戰雖破牛
尾岡三壘而我軍傷亡頗眾官弁陣亡至二十四人士氣稍沮
臣已飛催成大吉由湖北迅赴三河尖爲西路之援應並檄周
寬世由桐城馳赴六安分紮州城及謝埠馬頭集保蔣凝學等
之後路又以長淮千里並無得力水師飭派李朝斌帶太湖師

經十營赴滬調現駐滬上之黃翼升帶淮揚師船六七營由洪澤湖入淮一則各歸本汛仍符奏設水師之初議一則駛至五河以上掃清滄渦淮肥汝潁諸巨川俾苗逆不得盡收水濱之利惟壽州城中僅五百饑疲之卒無升斗續進之糧累月苦守危在旦夕赴援之陸師既不能併力衝入續調之水師又不能剋期來會誠恐要地難保無以慰州牧毛維翼等倒懸之望憂灼之餘彌增愧歉除各路戰狀分案續報外合先附陳梗概伏乞

皇太后

皇上聖鑒謹

奏

奏利先二二二

三

攻克江浦浦口九洑洲江面一律肅清摺

同治二年五月十七日

奏爲水陸各軍會克江浦浦口二城草鞋夾燕子磯等數隘并力破九洑洲一關江面一律肅清恭摺馳報仰祈

聖鑒事竊自巢含和三城相繼攻克旋破雨花台等處石城石壘臣等於五月十二日陳奏在案厥後鮑超與蕭慶衍劉連捷等在和州息軍數日正擬席捲東下疊據探報賊中以雨花台連破石壘恐官軍大舉攻城又以崑新旣克恐滬軍大舉圍蘇李秀成與諸僞王紛紛改圖議由江北返援近救金陵遠救蘇州於是天長六合來安等處次第解圍羣醜南渡而賊之分踞橋林小店者亦於五月初五日冒雨掠舟紛紛搶渡江面人聲

喧闐不絕蕭慶衍度江浦浦口各賊股將無固志矣乃遣騎隊襲之行未中途聞浦口之賊先已棄城遁走江浦之賊獻書詣營乞降鮑超劉連捷察知其詐於初九日引軍疾進蕭慶衍出烏江與各水營會師約戰適李朝斌統太湖水師將赴滬上亦於是時道出金陵初十日李朝斌派部將鄔桂芳李助發江福山等師船由大江衝卡先駐浦口以扼忠酋餘黨之未渡江者臣玉麟自率定湘澄海清江三營臣岳斌自率親兵左後護衛等營並調正中副後副右親兵前四營同入內河詎師次江浦而賊又聞風宵遁遂會合陸師將江浦浦口一併收復仍沿途追剿鈔過逃賊之前賊正竄併九洲洲上偽城之賊不納我

舟師截江圍擊賊不得渡爭向蘆葦中駭竄不知叢葦密處水深丈許或數丈昔道光年間備夷之濠張國樑禦賊之濠又羣賊歷年添修之濠溝港縱橫人馬紛逐一蹴卽溺死者駢積以數萬計至十一日餘賊飢啼江邊旣爲新開河所隔不得仍回北岸又爲大江所阻不得徑渡南岸各水師分隊登陸盡日輪攻攔刃就戮者半墮江自沈者半惟新中營副將鄒桂芳飛檣前驅徑奪洲隘中礮死之此五月初十日克復江浦浦口兩城之情形也二浦旣復我軍將有事於九浹洲曾國荃乘夜至新江口與臣玉麟臣岳斌會勘該洲在驚流急湍之中高峙僞城巨礮層列對岸有攔江礮中關諸石壘又有草鞋夾下關七里

洲燕子磯十數堅壘賊艦賊划與爲倚護斷非陸師所能飛越亦非水師所易猝攻計莫如先取南岸數隘庶撤其藩籬而九洲乃有下手之處十二日派丁泗濱許雲發楊明海胡俊友等四營爲頭隊從下關進派喻俊明唐敏義陶樹恩嚴定國羅宏裕楊占黿等六營爲二隊從草鞋夾進更派彭楚漢傅敏才顏海仙張錦芳等爲三隊以應之臣岳斌仍與李朝斌往來督戰臣王麟親督成發翔任星元兩營據九洲上流作欲攻不攻之勢使洲賊不暇兼顧南岸調派既定十三日天未嚮明丁泗濱喻俊明彭楚漢等乃循南岸飛駛而下將逼賊巢賊竟萬礮齊轟猝不得近其壘我軍預以枯荻灌油縱火江上先焚其

舟數百賊艦一時俱燼眾勇乘勢薄壘有緣牆而上者有從礮
眼中搶險而入者遂平下關草鞋夾八賊壘移師轉向中關該
關內倚小河外濱大江水流箭急師船不能上駛胡俊友舍舟
遵陸突出壘下方將一躍而登忽爲槍子洞腹遽殞於陣陶樹
恩許雲發憤極搏戰復裹重創士卒亦損折過眾回軍暫息乃
於次日分兵襲破燕子磯殺賊毀壘而還此十三十四等日屢
克下關草鞋夾燕子磯三隘之情形也先是臣岳斌詢諸土人
知江濱叢莽中有隄埂一道可達九洲賊濠之外至是商令
陸軍劉連捷楊鎮南數隊由隄埂缺處鳧水而進派彭楚漢傅
敏才顏海仙三營從洲尾攻上派張錦芳成發翔任星元三營

由洲頭攻下派喻俊明唐敏義嚴定國等及李朝斌所部之李
助發周正林江福山等營各駕舢板繞洲奮擊另飭丁泗濱羅
宏裕楊占鰲等由南岸分領水師直趨中關十五日昧爽兩岸
並舉人人皆殊死戰賊之在中關者自恃附城爲壘卒不稍動
其堅踞九洑洲者下有賊划上有僞城千礮環轟片刻不息又
於東西南三路分伏洋槍悍隊伺間出擊損我精銳幾不可以
數計彭楚漢唐敏義負創角戰誓得此隘而甘心戰至日晡賊
少怠矣乃於初更時謀之成發翔喻俊明顏海仙張錦芳等乘
月色昏暗中移船潛近賊壘會西南風大作衆軍以火箭攢射
立焚水中拖罟數隻風引火猛燃及洲上卡房喻俊明李朝斌

麾軍直上成發翔任星元張錦芳在左彭楚漢顏海仙唐敏才
在右各率弁勇大呼升岸丁泗濱亦自中關鼓漿而來躍過重
濠肉薄齊登前鋒旣殪後者更進踰者被戕踐尸復登竟以二
更後越牆撲入聚殲羣醜無一脫者遂奪九洑洲僞城一座并
獲大礮數百尊牛馬旗械無數此又十五日力克九洑洲之情
形也臣等查九洑洲爲大江關鍵與金陵相犄角實逆首所必
爭之地幸賴

天威震疊奪此要隘北岸盡爲我有長江一律肅清從此圍攻
金陵較有把握諸將士酷暑鏖兵血戰至五晝夜之久傷亡至
二千餘人之多實亦可嘉可憫此次尤爲出力之提督銜浙江

定海鎮總兵喻俊明浙江黃巖鎮總兵丁泗濱記名總兵彭楚漢楊明海均請

交軍機處記名遇有提督缺出請

旨簡放彭楚漢一員

臣

國藩曾於堪勝水師總兵案內特保應

請

先擢總兵實缺記名提督浙江處州鎮總兵李朝斌因赴滬之便竭力助攻應如何

加恩之處恭候

聖裁記名提督江南京口協副將成發翔前於克復巢縣案內推爲首功此次應如何酌獎仍候

聖裁總兵銜副將楊占鼇李助發嚴定國副將顏海仙羅宏裕
傅敏才周正林李宏試均請

交軍機處記名遇有總兵缺出請

旨簡放楊占鼇並

賞加提督銜李助發顏海仙羅宏裕傅敏才並

賞給勇號記名總兵張錦芳請

賞加提督銜已保總兵銜副將唐敏義請

賞給勇號副將銜參將許雲發陶樹恩均請以副將儘先補用

並

賞給勇號許雲發並加總兵銜游擊江福山請以參將儘先選

用並加副將銜其餘出力人員可否由臣等專案奏獎出自
天恩至總兵銜副將鄔桂芳副將胡俊友力戰捐軀深堪憫惻
均請照總兵陣亡例從優

賜卹以慰忠魂此外陣亡各員弁咨俟查明彙案奏卹所有官
軍克復各城隘及九洑洲緣由謹會同大學士湖廣總督臣官
文江蘇巡撫臣李鴻章浙江巡撫臣曾國荃恭摺由驛六百里
具奏伏乞

皇太后

皇上聖鑒訓示謹

奏

近日軍情片

同治二年五月二十七日

再近日軍情壽州一城苗逆圍攻如故蔣凝學毛有銘等於五月十三日毀東皋峰逆壘數座該逆續調悍黨增修多壘意在以長圍久困城內米糧久罄殺馬食士聞苗黨有夜棹小舟運麥八石以濟城中者可知從苗之心亦不甚堅臣現檄周寬世四營紮迎河集及四十里鋪保蔣凝學等之後路成大吉於十四日在麻城之宋埠拔隊亦令併援壽州以厚兵力其濱江一帶自九洑洲攻克後臣蕭慶衍駐江浦浦口以固北岸之防派鮑超渡江進紮孝陵衛以合金陵之圍十四日吳坤修萬化林等水陸勦賊破楊四渡六壘王可陞何紹彩周萬傳等併在裴

公渡雁翅斗門連破七壘遂收復金寶圩距蕪湖金柱關百里
內已無賊蹤西河灣汴各防亦均穩固甯國守將劉松山先於
初八日赴涇縣與易開俊會剿灣灘大坑之賊獲一勝仗十六
日僞襄王奉王等股一由章家渡擾及丁村一由大坑逼犯涇
縣易開俊分隊出擊力戰卻之其青陽守將朱品隆既破梅林
兩卡又毀陵陽鎮四壘直薄石埭城下屢攻未克回軍仍駐青
陽徽州嶺附近無戰事饒州景德鎮一帶劉勝祥於十二日獲
一勝仗劉典席寶田於十四十五日各獲勝仗李榕抵湖口後
因病卒太多賊勢太眾尙未接戰俟江忠義到湖口與饒軍兩
路并進江西各賊股必可悉就驅除臣當檄江忠義李榕席寶

田等各率所部自石太漸進東壩則攻取金陵老巢較有把握
矣然金陵城大賊眾諸酋目眷屬資財萃聚於斯洪逆老於戎
事又畱偽忠王不援蘇州共守金陵斷無輕棄之理必須力斷
接濟仿照昔年攻九江安慶之法嚴防江路禁截賊糧則百餘
里之城數十萬之賊專恃肩挑陸運勢必不給數月以後當有
因飢內訌之事查前此長江上下輪船與紅單師船均不免暗
中濟賊除紅單船一項由臣設法查禁外輪船往來剽疾稽察
尤難應請

旨勅下總理衙門照會英法各國公使於金陵未克以前不得
在該城外停泊輪船庶該逆城孤糧絕不至又成持久之局所

有近日各路軍情合先附陳大概伏乞

聖鑒訓示謹

奏

覆陳金陵壽州軍情摺

同治二年六月十一日

奏爲欽奉

諭旨恭摺覆陳仰祈

聖鑒事同治二年六月初四日承准議政王軍機大臣字寄五月二十七日奉

上諭曾國藩前奏鮑超等軍追賊已至江浦飭令攻克二浦後卽進攻九洑洲茲據都興阿等所奏江浦浦口已於本月初九日攻破七里洲於十二日攻破九洑洲於十五日攻破九洑洲爲江中要地賊踞堅壘數年之久官軍此次攻克竟能敏速如此都興阿等所奏諒係實情曾國藩奏報是否業已在途著卽

將詳細情形迅卽馳奏都興阿等摺內所稱忠逆帶隊渡江援浦爲梁正源截擊於寶塔根里洲之賊向中關回遁其九匪紛竄均須確切查明妥籌堵剿曾國荃業將雨花台賊壘攻克茲九洑洲又爲鮑超等乘可乘應卽如何相機進擣及賊應接不暇以圖進取之處思鎭走江路水陸寬廣備禦等因欽此又於初八日續奉上諭二浦九洑等洲克復情形迄今尙未據曾國藩奏報前據

都興阿等奏到當經寄諭該大臣迅將詳細情形及水陸進取
機宜迅速馳奏此時諒已奏報在途其馮子材等規復丹陽進
兵機宜並著該大臣妥籌指示策應調度以期互相犄角毋誤
戎機唐訓方前奏爲苗練所困情形甚爲急迫連日總未得其
奏報廕系殊深疊經諭令曾國藩設法撥兵馳援現在臨淮壽
州蒙城等處該大臣曾否派兵前往救應如何布置及各該處
現在情形如何著曾國藩迅速馳奏等因欽此仰見我

皇上軫懷南服須臾不忘竊二浦九洲等處距揚州較近而
去安慶甚遠揚州距京較近而安慶又稍遠臣於二十一日聞
九洲洲克復之信二十五日始接各營公牘卽於二十七日馳

奏郵路阻長不得與都興阿同時奏到早慰

宸廑致

朝廷殷殷瞻念無任慙悚各軍戰狀臣已詳細馳報其金陵近日布置與苗逆近日情形理合縷晰覆陳

諭旨垂詢餘匪紛竄妥籌堵剿及嚴防裏下河一節臣查三月之杪偽忠王銳意犯鄂自攻撲石洲埠廬舒六安等城連不得逞折而東趨又聞其銳意以犯揚州并犯裏下河厥後李鴻章之兵攻破崑山進逼蘇州曾國荃之兵攻破雨花台各石壘而巢縣和含次第克復於是逆謀大亂紛紛南渡遠救蘇州近救金陵天六來安瓜洲之賊不擊而自退江浦橋林浦口之賊不

攻而自破在忠酋之意收回江北羣賊以全力保守江南僅留精銳分守九洑洲七里洲等壘與金陵相犄角爲堅拒不拔之基不料我軍大舉進攻正值羣賊甫渡中洲未達南岸之際凡競渡之賊與守壘之賊蟻聚於濠汊蘆葦之中各礮船繞洲圍攻登岸搏戰數萬悍寇悉數聚殲縱偶有倖脫者亦不過逃歸金陵老巢竄未嘗紛竄江北致貽裏下河之患此臣自去冬以來所深慮至是始稍釋隱憂者也

諭旨垂詢如何相機進擡會商滬浙攻取蘇杭一節九洑洲甫克以後臣卽檄鮑超南渡檄蕭慶衍防守二浦旋接楊岳斌會國荃來函請調蕭慶衍同渡南岸紮駐神策門一帶而以鮑超

一軍繞過鍾山直達孝陵衛漸圖合圍爲持重之謀者則以城垣太廣兵力尙單不宜遽求合圍恐大股援賊齊至一隙可乘全局俱震爲制敵之謀者則以浙攻富陽漚攻蘇州金陵亦宜迅速合圍使該逆備多力分不遑兼顧或者致力於金陵收效於蘇杭三處有一得手兩處可期并下臣亦主合圍制敵之說與

諭旨所示使賊應接不暇者暗相符合特勁旅無多不足以鑿深根之寇擬俟江西邊境蕩平再調江忠義李榕席寶田等軍由皖南漸趨東垣會剿金陵一面咨請揚州鎮江防兵前來協剿亦非旦夕所能集事此籌剿金陵老巢之大略也

諭旨垂詢壽州蒙城近日情形一節苗逆復叛以後臣先後飭派蔣凝學毛有銘周寬世成大吉等援救壽州壽州三面環水僅南門一面可通又以賊寨林立與水際礮划相爲倚護四月二十八日之戰毀牛尾岡三壘五月十二日之戰毀東皋峯數壘二十六日猛攻城外賊壘未下而我軍三次苦戰已損精銳二千餘人之多據署知州毛維翼遣死士梟水出城稱城中野草雜蔬摘食俱盡道殣相望勢將不支蔣凝學毛有銘以重金啗苗圩潛運米麥進城翼再堅持數日成大吉趕至必可合解重圍不謂六月初二日運米者甫入而下蔡外委邱維城旋於初四日四更舉城獻賊毛維翼力戰死之臣以壽州旣陷皖北

與豫鄂三省震動乃檄蔣凝學暫駐三河尖辦足米糧移紮潁
州以保要郡而衛豫境檄成大吉仍紮三河尖以蔽鄂疆檄周
寬世退紮六安州以固皖省毛有銘暫駐六安爲諸路游擊之
師亦因傷亡過多難遽進剿也苗沛霖旣得壽州凶燄彌熾勢
必窺伺臨淮臣現飛調何紹彩四營由甯國北渡馳赴臨淮歸
唐訓方調遣前調之黃翼升淮揚師船須俟李朝斌抵滬後始
得交替防務上駛入淮輾轉需時尙恐緩不濟急又飛咨彭玉
麟楊岳斌選派舢板八十號星赴臨淮援剿苗逆待黃翼升到
淮仍令各回本汛臨淮能否保全尙不可知其蒙城一軍則更
無兵撥鞭長莫及憂愧徒深此壽州失陷後力圖補救之情形

也伏查去冬今春危險疊生自巢含二浦九浹洲次第克復長江數千里盡爲我有江北髮逆一律肅清方幸大局旋轉澄清有日不謂苗逆煽亂壽州被陷是皆微臣治軍無狀調度多乖

愧憤曷已運同銜署安徽壽州知州毛維翼忍飢撫士扶病登陴以練丁五百人苦守七十六日民皆效死弗去卒至食盡力竭城陷同殉亮節孤忠一時實絕惟有籲懇破格

恩施准將毛維翼追贈道員照道員陣亡例從優

賜卹仍於原籍及死事處所建立專祠以彰忠靈其餘在城文

武員弁俟查明月行辦理自李續宜丁憂回籍臣卽兼統其部

下四軍去歲賊竄江北驟失三城臣調肅慶衍毛有銘兩軍南

援遂將防守壽州之三營移駐六安等處今歲苗逆旣叛又不能以全力撲滅苗黨仍留蕭慶衍會剿巢縣調成大吉回援鄂省實有顧此失彼之咎應請

旨將臣交部嚴加議處至各軍救援不力均有應得之咎布政使銜安肅道蔣凝學首先調援初到壽城稟請破苗解圍確有把握厥後一戰失利自悔輕敵貽誤匪淺應請

旨革去布政使銜記名提督成大吉在湖北接到飛檄久不成行五月十四日在麻城之宋埠拔隊遲至二十四日始抵固始又復逗遛數日竟未趕至壽州實屬遲延玩誤請

旨將成大吉撤銷勇號以參將降補稍示懲儆仍各留營帶隊

以觀後效按察使銜記名道毛有銘同辦一事厥咎維均惟該員前在石澗埠苦守半月終解重圍克復東關之後馳驅數百里赴援六壽瀕行之時其缺餉與成大吉相同而拔隊迅速不敢稍誤師期功過尙足相抵應請免其置議所有遵旨覆奏緣由恭摺由六百里馳陳伏乞

皇太后

皇上聖鑒訓示謹

奏

覆陳南洋通商大臣無庸改設摺

同治二年六月十二日

奏爲南洋通商大臣一缺籌度現在情形仍請無庸改設恭摺
覆陳仰祈

聖鑒事竊臣於上年六月初六日奏改長江通商大臣一案經
總理衙門議將駐紮處所及廉俸各款請

旨仍飭臣會同薛煥酌定具奏臣遵卽與薛煥往返函商悉心
籌畫統計通商大臣廉俸一項添設官屬書役等項每歲約需
銀四萬餘兩目前卽無庸月建衙署而於長江各口租備行館
僱用輪船所費亦屬不貲數年後漸推漸廢勢必有增無減濱
江四省中外交涉事件果能一一取決於專設之大臣誠不敢

爲

國家惜此帑項惟事有粗論之而僅得其端倪細審之而始盡其曲折者薛煥奉到會議廉俸之

旨又經專函與臣縷商具道長江通商使臣所以可裁之故蓋有數端其大意以爲自各國公使駐京一切裁決於總理衙門凡各口洋人偶違條約有時可與力爭則可就關員結辦卽臨以督撫而有餘有時爭之不服則動向公使陳訴雖臨以大臣而無濟大臣巡歷各口督撫近駐本省洋人性急弗耐守候不能不由本省就近辦理有時督撫奏咨未及到京而公使早已周知郵遞之稽遲尙不及輪船之迅速況由大臣輾轉覆咨更

恐貽誤事機至華洋商民爭鬪構釁關涉刑名案件事隸地方有司尤不能不資督撫之力庶飭辦易而呼應更靈通商縱有專員在內仍不能免總理衙門之煩瀆在外仍不能減各省督撫之責任虛繫一官有名無實各等語剴切見商臣比致覆書深服其言之精當然猶以蘇皖羣盜如毛臣專謀軍事恐難兼顧洋務厥後李鴻章奉

命兼領通商大臣數月以來秩然就理益信華洋交涉之事均係疆吏必不可省之事是五口大臣固屬可裁卽長江大臣亦同虛設相應請

旨仍照薛煥原奏裁撤通商大臣一缺歸併本省督撫及將軍

經理以節糜費臣於中外撫馭機宜向未諳究而因時權變又何敢以奏設在先堅持初議曲爲迴護所有南洋通商大臣仍請裁缺緣由謹繕摺由驛具奏伏乞

皇太后

皇上聖鑒訓示再此案前經臣咨請薛煥主稿會奏逮薛煥定稿寄皖卽已束裝北上近始接其到京來函是以覆奏稍遲亦不復會銜矣合併聲明謹

奏

彙報各路軍情摺

同治二年六月二十七日

奏爲彙報各路軍情先陳梗概仰祈

聖鑒事竊金陵與壽州等處軍情臣於六月十二日馳奏在案

近日探報僞忠王侍王均隨洪逆堅守金陵搬運蘇州之糧接濟老巢曾國荃一軍自五月十五十八等日攻破金陵南城角長干橋一壘二卡後圍逼如常別無戰事鮑超至鍾山築營將竣本擬移紮孝陵衛旋因自染暑瘧又以軍中疾疫大作死亡相屬恐前敵爲賊所乘遂平毀鍾山營基仍駐神策門沿江一帶金陵城下暫難合圍臣亦以江西未靖皖南方棘恐鮑超須調剿上游不敢令其遽爾合圍也蕪湖甯國南陵涇縣各城金

柱關灣沚青之江各隘雖抽調何紹彩西河一軍而水陸防守幸均完固僞輔王楊七麻等股在於東水陽新河莊結卡踞守亦未敢伺隙內犯二十至二十六等日甯國守將劉松山會約涇縣守將易開俊剿賊於黃村北貢里曹村考坑薺麥灣等處四戰四捷朱品隆亦自青陽會剿於木竹潭順安鎮黃柏嶺等處獲勝三次斃賊極多前據搜獲僞文忠酋欲調黃李古賴各賊回援金陵近則并無其事古賴劉藍等遁仍在太石涇旌之交黃李等逆則麤聚於湖口都鄱一帶數月以來江西官軍與左宗棠派援之師苦戰苦守屢獲勝仗景鎮鄱陽之賊次第退竄沈葆楨又咨調江忠義專剿湖口滿擬卽日全境肅清六月

初二日韓進春在洋塘挫潰凶燄復張目下賊勢趨重湖口一路六月十七日猛撲江忠義堅山營寨李榕部將陳由立援剿獲勝旋以追賊致挫十九二十三等日復來堅山圍營攻撲甚猛江忠義雖係宿將而所部老勇較少新募居多李榕則全係新立之軍未經大敵殊可危慮由湖口下至彭澤馬當東流上至屏峯南康都昌濱江濱湖一片逆氛臣現咨商彭玉麟多帶礮船親赴湖口援剿江西

寄諭所示廓清江境然後併力皖南規取金陵誠爲確不可易之理卽當欽遵辦理苗逆旣陷壽州北圍蒙城益力又遣黨至汪家集西伺霍邱蒙城勢尤危迫臣與唐訓方均無兵可撥鞭

長莫及憂灼徒深霍邱居三河六安之中迤東北曰溜子口密
邇正陽最據形勝臣令蔣凝學暫不赴三河尖就駐防溜子口
令周寬世撥三營駐防迎河集該二處皆賊所必爭兵力過單
未知能穩守否毛有銘所部則守六北壽南之老廟集以杜野
掠而保米糧且令良圩有所依附不致盡叛歸苗指曰水師入
淮或者大舉會討較有下手之處除各路戰狀分案續報外所
有近日軍情合先由驛具陳大概伏乞

皇太后

皇上聖鑒訓示謹

奏

彙報近日各路軍情摺

同治二年七月十二日

奏爲彙報近日各路軍情恭摺仰祈

聖鑒事竊自大江南北兩岸軍事孔亟歷奉

寄諭指示周詳殷殷以金陵江西及淮上各防爲慮其大概情

形臣於六月二十七日具奏在案茲復就近日戰守事宜分晰

條列續陳於左

一金陵各軍疾疫過半鮑超所部靈營爲尤甚僞忠王侍王輔

王章王等糾率悍黨堅守老巢時復伺隙出戰以圖一逞六月

二十二日突分兩枝一出儀鳳門直撲鮑超靈字右營一出太

平門繞撲劉連捷南字等營我軍轟擊竟日負創而遁七月初

一日又以西瓜炸礮猛攻劉連捷下關營寨勢更兇悍得水師協力苦戰擊退而李成謀與劉連捷各受槍傷幸不甚劇聞白齊文投入賊中以重金廣置礮礮分解金陵現在劉連捷營外明掘直濠暗開地道計日內必有數次惡戰又准李鴻章鈔送忠酋等僞文新調僞護王湖王同援金陵展王爲王改守句容但願羣逆畢萃金陵或者蘇常等處有機可乘未始非官軍之利也

一毛鴻寶請調張運蘭入粵欽奉

諭旨垂詢所部老湘營能否調往飭臣酌量辦理張運蘭自上
年十月閒因病回籍所部湘勇十營卽派部將易開俊劉松山

各統五營分守甯國府涇縣兩城甯國當廣德建平之衝涇縣當太平石埭之衝易開俊等內防外剿屢卻賊氛城垣賴以保固所駐皆係最要之地臣處別無換防之師接據毛鴻賓來聞亦以該營欠餉過多一時恐難抽動已令張運蘭另募三千人帶赴粵中則原部湘勇自應仍留皖南以資得力

一太平石埭之賊堅踞如常六月十七日分股進章嶺羊棧嶺竄入黟縣意將由上溪口衝出婺源就食江西十八日王文瑞自祁門督軍會合劉典留守漁亭之各營併攻黟城一戰克之驅賊至嶺外十數里擒斬甚眾此次幸仗

天威剿辦極速不使徽州更增一患卽免江西再設一防

一江忠義李榕兩軍駐守湖口六月十九日堅山之戰僞堵王黃文金實負重傷二十八日勦賊於陳兵馬水車港等處二十九日追賊於梧桐嶺太平關等處分道馳擊均獲勝仗七月初三夜堅山營中俯瞰文橋賊巢火光隱約江忠義知賊將宵遁約李榕於將曙時引軍襲破諸壘賊乃敗過黃沙嶺分竄都昌彭澤境內湖口已無賊蹤江忠義等加派隊伍裹帶乾糧馳追三日尚未收回前奉

聖諭速由湖口與饒軍並進將江境各賊悉力驅除由石太進取東壩有此一捷賊鋒稍挫如江西一律肅清臣即當催令江忠義李榕等欽遵

前旨妥速辦理

一恭奉六月初五日

諭旨垂詢李世忠作何動靜飭臣隨時奏聞李世忠之心跡中外皆不敢深信臣於二月二十七日亦經密陳及之乃二浦並陷深感

聖主之不加嚴譴九洑洲旣克又畏楚軍之難與抗衡臣察其愧悟漸生頗知斂抑亦復推誠相待事事示以不欺近接該提督來函有五河地方爲臨淮後路倘苗逆下竄誓必堅守五河決一勝負等語李世忠與苗逆積怨甚深其欲發憤剿苗旣伸公義又報私讐似屬出於至誠近日臣處餉項極絀數月以來

並無銀米子藥解濟滁州李世忠亦無怨望之意若坦然相處
當不至別生枝節

一苗逆圍陷壽州後遣黨在正陽關增壘浚濠尙未蠢動何紹
彩陸師四營於六月二十六日取道廬州前進彭玉麟楊岳斌
所派舢板八十號亦於二十二二十五等日由九洑洲先後開
行計此時均已趕到臨淮得此水陸倚護唐訓方之老營可期
穩固惟蒙城糧路將絕危殆萬分恭讀六月十九日

諭旨命臣月籌一軍赴潁上擣苗逆老巢能否於江北陸路防
軍內抽調勁旅或徑援蒙城或由定遠馳抵懷遠等因查江北
陸營如蕭慶衍所部駐防江浦浦口周寬世所部分防桐城六

安迎河集等處蔣凝學所部分防潁州霍邱三劉集等處成大吉所部扼防三河尖一帶毛有銘所部扼防老廟集一帶各守要區萬難抽撤此外實無一枝勁旅可援蒙城並赴潁上無以仰慰

宸廑曷勝愧悚以上六條均係

諭旨垂詢之件及各路布置情形除戰狀分案續報外合先逐條詳列由驛五百里馳陳伏乞

皇太后

皇上聖鑒訓示謹

奏